

Saturday, May 16, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

UNION MINISTER

Union Minister of State for Consumer Affairs, Food And Public Distribution Pi Nimuben Jayantibhai Bambhaniya chuan vawiin khan Chawngtlai khuua Handloom Training Centre leh PMAY-G hnuuaia insakte a tlawh.

Union Minister hi SHG member-te nen VC House-ah inkawmna hun an hmang a. Minister chuan Handloom Training Centre-a thawktute leh zirlaite nen inkawmin, an puan tah mawi tak takte chu zau zawka pholan theih ni se tha a tih thu a sawi a. PMAY-G hnuuaia in sa zo tawh chhungkaw 2 tlawhin, sawrkar scheme hmang tangkaia in an din thei chu a lawmpui thu a sawi a ni.

VC House-ah Chawngtlai SHG member-te nen inkawmna hun an hmannaah Minister chuan mipuiin SHG thil siam chhuah (product) reng reng tha tura an rin theih nan thianglim tak leh quality tha taka thil siam zel turin a chah a. Sawrkar laipui chuan hmeichhia, thalai, lo neitute leh mi harsa zawkte chawikanna leh tih hmasawn a ngaih pawimawhzia tarlangin, sorkarin hmeichhiate tana scheme hrang hrang a siamte Khawzawl nuho pawhin hmang tangkai turin a fuih a. SHG thil siam chhuahte pawh zau zawka thehdarh dan leh man tha zawka an hralh theihna turte ngaihtuah a pawimawh thu a sawi a ni.



LOK SHABA MP

Lok Sabha MP Pu Richard Vanlalmangaiha chuan Upa ngaisang hnam apiang an ding chhuak thin tih a sawi.

Pu Richard Vanlalmangaiha hian nimin tlai khan Hnahthial Bazar Vengah Mizo Upa Pawl: Sub-Headquarters, Hnahthial Office chu a hawng a. He hunah hian Pu Richard Vanlalmangaiha chuan Sawrkar Laipui pawhin Upate chu a ngaih pawimawh tih a sawi a. Upate chu an VIP an nih thu leh Upa ngaisang hnam apiang chu hnam dingchhuak an nih zel thu a sawi bawk. Kum tam tak chhung an lo fawmkhawm tawh an thiamna leh finna te chu thamral tir mai lovin ram leh khawtlang hruaitute chu an rorelna kawngah lo finchhuah zel turin a sawm bawk a ni.

He hunah hian bialtu MLA Pu Jeje Lalpekhluah chuan MUP chu a ngaih pawimawh thu sawiin, mi in luah ngai lova anmahni puala building a la hmuhsak thei lo chu pawh a tih thu sawi a. Mahni hriselnate ngai pawimawh tura chahin, Hnahthialah ringawt pawh Healthcare Scheme hnuuaiah hian damlo enkawl nan a thlawnin cheng nuai 91 chuang man an hman tawh thu tarlangin la in register ve lo te pawh lo ngaihven ve thuai turin a chah nghal a ni.

MUP Office hawn thar hi Bazar Veng, Pu C. Lalfakzuala building chung zawk niin luah man hi MLA Fund atanga pek a ni dawn a. Hei bakah hian upate intihhlamna tur - TV, Carrom Board leh thil dang dangte MLA hian hlan nghalin WiFi, Tui leh Gas connection-te pawh tih fel nghal vek a ni bawh a ni.



I&PR MINISTER

I&PR Minister Pu B. Lalchhanzova chuan Chanchinbu mite chu amah finchhuah zel turin a chah.

Nizan khan Pu B. Lalchhanzova hian Lianchhiari Run, I&PR Pisa-a Mizoram Journalist Association (MJA) te hun a hman pui a, he hunah hian minister chuan mihring te chu mahni duh leh beisei ang veka an nun vek loh chang te a awm tih sawiin, tih dik loh leh khalh ngil a ngaihna laiah chuan fin chhuah zel turin MJA memer-te chu a chah a ni.

Nizan hun hmanah hian I&PR Department leh MJA ten zanriah an kil ho a, thawh hona tha zawk an neih chhonzawm zel theihna tur kawng hrang hrang an sawi ho bawh a ni.



DM&R MINISTER

DM&R Minister Prof. Lalnilawma chuan fur pui lo thleng turah chhiatna a lo thlen palh pawha rang taka che chhuak turin sawrkar chu an in buatsaih reng thu a sawi.

Chief Secretary Conference Hall-ah nimin khan Disaster Management & Rehabilitation (DM&R) Department Minister Prof. Lalnilawma kaihhraina hnuaiyah DM&R official-te leh District tin Bawrsap te an thu khawm a. Minister chuan District-a chhiatna a lo thlen palh pawha rang taka pui turin sawrkar chu an in buatsaih reng thu sawiin, District hrang hrangte report atangin District Focal Person neih te, Department District Monsoon Action Plan neih te leh Resource Assessment neih te chu tha a tih thu a sawi tel bawh a ni.

Minister chuan fur hun hmaa inbuatsaih lawkna, department hrang hrang thawhhona leh chhiatna hlauhawm a thlen pawha rang tak hmalak a pawimawhzia sawiin, mipui himna turin hmalakna chak zawk neih chu a ngaih pawimawh thu a sawi. Minister chuan kan tanrual chuan he furpui lo thleng tur hi kan hmachhawn thei ang, a ti.

Thutkhawmah hian furpui lo thleng tura district hrang hrang te in buatsaihna leh SDRF/SDMF hnuaiya an hmalakna tawhna leh hmachhawp hrang hrang te, Monitoring an kalpui dan te leh SDRF/SDMF hman dan tura project bawhzui hmasak tur (Prioritize) ruahman dan tur te leh rualkhai zawka hmalak dan tur sawi ho a ni.

